



NOROGGA SÁMEDIKKI 30 JAGI ÁVVUDEAPMI KÁRÁŠJOGAS 25.9.2019

Dievasčoahkkinjođiheadđji, Norgga ja Ruota sámedikki presideanttat, buorit sámedikke áirasat, stuorradikki presideanta sihke buorit ávvuossit,

mus lea stuorra illu ja gudni buorit Suoma Sámedikki beales dearvvahusa Norgga Sámedikki 30 jagi ávvudoaluide.

Sávan Norgga Sámediggái eatnat lihku. 30 jagi lea rávesolbmo ahki. Nu lea maid min vuosttamuzžan áhahuvvon Sámediggi ollen dan ahká. Doaibmavuogit leat sajáiduvvan ja mii diehtit man lunddot doaibmin Norgga Sámediggi lea šaddan.

Lean čavlaí min buori ovttasbarggus. Mis leat nu ollu oktasaš áššit, nu mo sámegiella. Min oktasaš, váimmu giella.

Dát jahki lea eamiálbmotgielaid temájahki. Dál čavčča bealdi čalmmustahttit dan iešguđetge láhkái. Mii golbma Sámedikki ovttas Sámi Giellagálduin lágidit golggotmánus (9.-10.10.2019) giellaseminára Anáris. Vaikko seminára leage oaivvilduvvon earenomážit daidda, geat barget sámegielaiguin, de sávan din buohkaid boahtit Anárii.

Golggotmánus lágiduvvo maid Sámi giellavahku (21.-27.10. 2019) iešguđetge guovllus Sámis.

Mánobadđji dassái mus lei stuorra illu váldit vuostá *Sámás muinna* -giellakampánja nuortalaččaid ásaiduhttima 70 jagi ávvudoaluin Čeaveťjávrris. Dán kampánjii bohtet ain eanet sámegielat fárrui – dál maid nuortalaš- ja anárašgielat. Dat lea munnje erenoamáš dehálaš ja divrras.

Danin hástalange juohke ovttas mis roahkasmuvvat ealáskahttit sámegiela ja oahpahallat nuppi sámegiela vai ain buoret gulahalašeimmet gaskaneamet.

Min ovttasbargoorgána, Sámi Parlamentáralaš Ráđđi (SPR), áhahuvvui jagis 2000. Das rájes min ovttasbargu lea šaddan jagis jahká buorebun aht' buorebun, nannosabbon aht' nannosabbon, gievrrat aht' gievrrat.

Mis oktan dehálaš mihttun lea earret eará hábmet oktasaš, davviriikkalaš linnjaid sámiid kulturárbbi ja árbedieđu hálddašeamis, ávkkástallamis sihke suodjalandárbbuin ja -vugiin.

Lean rámis min buori oktasašbarggus, go leat ovddidan davviriikkalaš sámesoahpamuša. Boahttevuodas min ovttasbargu boahtá leat ain deháleabbo, go oktasaš hástalusat ja váttisvuodát guovlladit fas dieváid ja duoddariid duohken. Beaivválaš muittuhusat dain goaikkehit mediaid bokte. Dál leat beaggán ovdamearkan Jieknjameara ruovdemáđiija ja Deanu soahpamuša čuolmmat.

Muhto ovttas mii bihtit. Nu mo sámi gánda nagodii stálu vuostá.

Loahpas háliidivččen Sámedikki bealis muitit smávva skeaŋkkain dán dehálaš mearkabeaivve. Dán távvala lea málen nuorra dáiddár, *Heidi Juliana Gauriloff* ja dan namma lea *Eallima rávdnji davvin*. Dás lea čakčageasi duoddara johkaleahki, gos iešguđege vuoddagat golggiidit fárrrolagaid ja symboliserejit oktasašbargomet. Govas leat mielde iešguđege guovllu sápmelaččaid - anáraččaid, nuortalaččaid, Eanodaga, Ohcejoga ja Vuohču - čikjavuoddagat. Govva muitala mu mielas bures min oktavuoda ja luonddu čábbodaga. Bivddán dievasčoahkkinjođiheadđji váldit vuostá skeaŋkka.